




Sesi penjelasan, penerangan diterus

Kabinet
berpendapat
rakyat perlu
diberi
kefahaman

Oleh Luqman Arif Abdul Karim
dan Siti Sofia Md Nasir
bhnews@bh.com.my

Kuala Lumpur: Pelaksanaan Program Subsidi Petrol mulai esok ditangguhkan sehingga ke satu masa yang akan diumumkan kemudian, kata Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail.

Beliau berkata, keputusan untuk menangguhkan program itu dicapai pada mesyuarat Kabinet pada 18 Disember lalu untuk membolehkan sesi penerangan dan penjelasan diteruskan bagi memberi kefahaman dan mempersiapkan rakyat menerima pelaksanaan program itu.

Katanya, keputusan itu juga bagi memberi ruang kepada proses pendaftaran penerima daripada golongan isi rumah berpendapatan pertengahan 40 peratus (M40) yang akan dikendalikan oleh Kementerian Kewangan.

"Sementara menunggu pengesahan pelaksanaan program itu diumumkan, rakyat akan terus menikmati harga petrol berda-

sarkan sistem sedia ada," katanya dalam satu kenyataan, semalam.

Kerajaan pada 7 Oktober lalu mengumumkan pelaksanaan Program Subsidi Petrol dengan peruntukan RM2.4 bilion dalam Belanjawan 2020 yang sepatutnya dilaksanakan esok, selaras manifesto Pakatan Harapan.

Program subsidi bersasar yang bertujuan menangani ketirisan bekalan bahan api itu dijangka memberi manfaat kepada lapan juta penerima daripada kelompok B40 dan M40 yang ketika ini berdepan peningkatan kos sara hidup.

Mereka yang layak akan diberikan subsidi petrol sebanyak RM30 sebulan untuk pemilik ke-

reta atau RM12 sebulan untuk pemilik motosikal yang disalurkan dalam bentuk pemindahan tunai dan dikreditkan terus ke akaun bank penerima setiap empat bulan.

Berikutan pelaksanaan program itu, harga petrol RON95 dan diesel akan diapungkan secara beransur-ansur.

Pada sidang media selepas menghadiri Program Kembali Ke Sekolah bersama Mydin di Mydin Bukit Mertajam petang semalam, Saifuddin berkata pelaksanaan program itu ditangguhkan sehingga Jemaah Menteri berpuas hati dan berpendapat ia boleh dilaksanakan dalam satu tempoh munasabah.

"Tiada masalah dengan program ini kerana semuanya kita sudah lengkapkan. Kita sudah bangukan sistem data penerima lengkap dengan nombor akaun, kaedah bayaran, malah kami juga sudah mengadakan simulasi bersama Jabatan Statistik.

"Namun, Kabinet berpendapat program ini masih memerlukan penerangan lebih lanjut kepada rakyat, jadi kita terima (keputusan itu)," katanya.

Mengulas lanjut, Saifuddin berkata pihaknya tidak kecewa dengan keputusan penangguhan itu biarpun semua persiapan sudah dilakukan sejak awal tahun ini.

"Tiada mana-mana pihak yang patut berasa kecewa atau rugi kerana mereka masih menikmati harga subsidi kerajaan sekarang," katanya.

 **Sementara
menunggu
pengesahan
pelaksanaan program
diumumkan, rakyat
akan terus menikmati
harga petrol
berdasarkan sistem
sedia ada.**

Saifuddin Nasution Ismail,
Menteri Perdagangan
Dalam Negeri dan
Hal Ehwal Pengguna

Program Subsidi Petrol ditangguh



Saifuddin bersama penerima pada majlis penyampaian kelengkapan sekolah di Mydin Jalan Baru, Bukit Mertajam, semalam.

(Foto Danial Saad/BH)